

**Aningaasarsianit akileraarutit pillugit inatsisartut
inatsisaata allanngortinneranik Inatsisartut inatsisaat
(Umiarsuarni timmisartunilu nammineq inuttut
sulinerup akileraartussaataassutaanerata, nunami
allami illuutitut atasumik taarsigassarsiat erniaasa
ilanngaataasarnerisa killilerneqarnerata
erseqqissarnerat kiisalu akuersissutininik pigisaqartut
ilaasa il.il. amigartoorutininik
kinguartiterisinnaatitaanerisa annertusineqarnera)**

§ 1

Aningaasarsianit akileraarutit pillugit inatsisartut inatsisaanni nr. 12, 2. november 2006-imeersumi, kingullermik inatsisartut inatsisaatigut nr. 11, 15. november 2007-imeersukkut allannguuteqartinneqartumi, allannguutigittinneqassapput makku:

1. § 1, imm. 2-tut nutaamik ilanngunneqassapput:

"Imm. 2. aalajangersakkami imm. 1, nr. 2-imi taaneqartutut inunnut atuupportaaq, sulisussarsiarineqarsimallutik umiarsuarni timmisartuniluunniit imaluunniit taakkununga atatillugu isumagineqartumik nammineq inuttut sulinermigut suugaluartumilluunniit akissarsiaqartoq, umiarsuaq timmisartorluunniit:

- 1) nunami maani angerlarsimaffeqartutut nalunaarsorsimappat,
- 2) Danmarkimi, Savalimmiuni nunaniluunniit allani angerlarsimaffeqartutut nalunaarsorsimappat, umiarsuaq timmisartorluunniit inuttaqanngitsoq selskabimit assigisaanilluunniit, § 1, imm. 1, nr. 3-miit 14-imut, § 2, imm. 1, nr. 10-12-imut aamma 14-imi aalajangersakkat malillugit akileraartussaasumit, imaluunniit inuinnarmit imm. 1, nr. 1 aamma 2, § 2, imm. 1, nr. 10-12 aamma 14-imi aalajangersakkat malillugit akileraartussaataasumit assartuinnermut atorineqarpat,
- 3) aammalu pigineqarluni ingerlanneqarluniluunniit umiarsuaateqarfimmit timmisartuuteqarfimmilluunniit pisortavii numami maani suliffeqartut, imaluunniit
- 4) nunami maani aalajangersimasumik inissisimaffeqarluni ukioq tamaat suliffeqartoq.

Malittarisassat nr. 1-miit 3-mut atorineqassanngillat umiarsuaq timmisartorluunniit inuttaqartinnagu danskit, savalimmiormiut nunamiluunniit allamiut umiarsuaatileqatigiiffiannit timmisartuutileqatigiiffannilluunniit atorineqarpat."

Imm. 2 matuma kingorna imm. 3-tut inissinneqassaaq.

2. § 2, imm. 1-imi, nr. 1-imi piiarneqarput:

"imaluunniit umiarsuarni timmisartuniluunniit Kalaallit Nunaanni angerlarsimaffeqartutut nalunaarsorneqarsimasuni,".

3. § 2, imm. 1-imi, nr. 17-itut nutaamikilanngunneqassapput:

"17) umiarsuarni timmisartuniluunniit imaluunniit taakkununga atatillugu isumagineqartumik nammineq inuttut sulinermigut suugaluartumilluunniit akissarsiaqartoq, umiarsuaq timmisartorluunniit:

a) nunami maani angerlarsimaffeqartutut nalunaarsorsimappat,

b) Danmarkimi, Savalimmiuni nunaniluunniit allani angerlarsimaffeqartutut nalunaarsorsimappat, umiarsuaq timmisartorluunniit inuttaqanngitsoq inunnik arlaqartunik assigisaanilluunniit, § 1, imm. 1, nr. 3-miit 14-imut, § 2, imm. 1, nr. 10-12-imut aamma 14-imi aalajangersakkat malillugit akileraartussaasumit, imaluunniit inuinnarmut § 1, imm. 1, nr. 1 aamma 2, § 2, imm. 1, nr. 10-12 aamma 14-imi aalajangersakkat malillugit akileraartussaataasumit assartuinnermut atorneqarpat,

c) aammalu pigineqarluni ingerlanneqarluniluunniit umiarsuaateqarfimmit timmisartuuteqarfimmilluunniit pisortavii numami maani suliffeqartut imaluunniit

d) nunami maani aalajangersimasumik inissisimaffeqarluni ukioq tamaat suliffeqartoq.

Malittarisassat litra a-miit c-mut atorneqassanngillat umiarsuaq timmisartorluunniit inuttaqartinngut danskit, savalimmiormiut nunamiluunniit allamiut umiarsuaatileqatigiiffianit timmisartuutileqatigiiffianilluunniit atorneqarpat."

4. § 15, imm. 4 imatut oqaasertalerneqassaaq:

"Imm. 4. Kalaallit Nunaata avataani illumik pigisaqartup akileraarutaasussanik isertitanut ilanngutissanngilai:

1) isertitat aningaasartuutillu,

2) illup pissarsiarinneranut ingerlanneranulluunniit atukkanik taarsigassarsiat erniaat,

3) taarsigassarsiat illu qularnaveeqqusiullugu taarsigassarsianut ernianut aningaasartuutit".

5. § 29, imm. 1-imi "Kalaallit Nunaanni atortussiassat aatsitassanit pisut il.il. pillugit inatsit naapertorlugu," kingornagut ilanngunneqassapput: "sermip erngullu avammut nioqqutissatut atorneqarnissaat pillugu inatsisartut inatsisaat,".

6. § 30, imm. 8-mi "Kalaallit Nunaanni atortussiassat aatsitassanit pisut il.il. pillugit inatsit naapertorlugu," kingornanut ilanngunneqassapput: "sermip erngullu avammut nioqqutissatut atorneqarnissaat pillugu inatsisartut inatsisaat,".

7. § 32, imm. 3-mi "Kalaallit Nunaanni atortussiassat aatsitassanit pisut il.il. pillugit inatsit naapertorlugu," kingornagut ilanngunneqassapput: "sermip erngullu avammut nioqqutissatut atorneqarnissaat pillugu inatsisartut inatsisaat,".

8. § 68, imm. 2 aamma 3 oqaasertalerneqassapput imatut:

"Imm. 2. Attuumassuteqarneq imm. 1-imi taaneqartoq sumiiffimmut kommunit aggornerisa avataaniittumut ilaappat, imaluunniit akileraartussaataasooq Kalaallit Nunaanni atortussiassat aatsitassanit pisut il.il. pillugit inatsit, sermip erngullu avammut nioqqutissatut atorneqarnissaat pillugu inatsisartut inatsisaat naapertorlugit atuinissaminut akuersisummik tunineqarsimappat akileraaruserivik kommunitut akileraarfittut isigineqassaaq. Akileraartussaataasooq Kalaallit Nunaanni atortussiassat aatsitassanit pisut il.il. pillugit inatsit, sermip erngullu avammut nioqqutissatut atorneqarnissaat pillugu inatsisartut inatsisaat naapertorlugit atuinissaminut akuersisummik tunineqarsimanermigut

misissueqqissaarnissaminut akuerineqarsimappat akuerineqarninilu malillugu taamaallaat ingerlatsippat, kiisalu akileraartussaataasunut § 32, imm. 3-mi pineqartunut ilaasunut akileraaruserivik kommunitut akileraarfittut aammattaaq isigineqassaaq.

Imm. 3. Kommunalbestyrelsi imaluunniit akileraartussaataasooq isumaqarpata akileraartussaataasumut kommune akileraarfissaq toqqarneqartoq eqqortuunngitsoq ukiup aningaasarsiorfiusup pineqartup naannginnerani akerliliissut kommunimi akileraarfittut toqqarneqartumi kommunalbestyrelsimut tunniunneqarsinnaavoq. Kommunitut akileraarfittut toqqarneqartoq akileraaruseriffiuppat, imm. 2 naapertorlugu, akerliliissut akileraaruseriffimmut tunniunneqassaaq. Nalornisoortoqartillugu akileraaruseriffiup aalajangiiffigissavaa kommuni sorleq akileraarfittut isigineqassanersoq. Taamaattorli akileraaruseriffik kommunitut akileraarfittut toqqarneqarsimatillugu nalornisoortoqarpat Naalakkersuisut aalajangiisuusussaapput."

9. § 85-imi "1. april" allanngortinneqassaaq uunga: "1. maj".

§ 2

Inatsit atortuulerpoq ulloq 1. januar 2009.

Namminersornerullutik Oqartussat, ulloq 5. december 2008

Hans Enoksen

/

Per Berthelsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

